

Odлуka o imenovanju pomoćnika direktora za Odjel za unutrašnju kontrolu Državne agencije za istrage i zaštitu

Koristeći se ovlaštenjima koja su visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem visoki predstavnik “pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora”;

Pozivajući se na stav XI. 2. Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu s gore navedenim “donošenjem obavezujućih odluka, kada ocijeni da je to neophodno”, o određenim pitanjima, uključujući i (prema tački (c) stava XI .2) “mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta”;

Pozivajući se takođe na Deklaraciju Vijeća za implementaciju mira iz decembra 1998. godine, u kojoj je Vijeće ukazalo na to da uspostava vladavine zakona u koju će svi građani imati povjerenje predstavlja preduvjet za trajni mir i samoodrživu

privredu, što će omogućiti privlačenje i zadržavanje stranih i domaćih investitora;

Ukazujući na Deklaraciju Vijeća za implementaciju mira iz maja 2000. godine, u kojoj je istaknuto da su “demokratska i odgovorna policija i nezavisno pravosuđe preduvjeti za vladavinu zakona i punu zaštitu ljudskih prava”;

Imajući u vidu to da je u septembru 2004. godine Upravni odbor Vijeća za implementaciju mira konstatirao da je od trajnog značaja izgradnja domaćih kapaciteta u svim institucijama za vladavinu zakona u BiH, uključujući policiju, sudstvo i tužilaštva, kako bi se osiguralo da ove institucije budu u potpunosti sposobne za borbu protiv organiziranog kriminala i drugih teških krivičnih djela;

Imajući na umu činjenicu da je Parlamentarna skupština Bosne i Hercegovine donijela zakon kojim je osnovana Državna agencija za istrage i zaštitu (u daljem tekstu: Zakon) 23. juna 2004. godine (“Službeni glasnik Bosne i Hercegovine”, br. 27/04, 63/04 i 35/05);

Imajući na umu takođe činjenicu da od donošenja ovog Zakona, Državna agencija za istrage i zaštitu (u daljem tekstu: Agencija) preduzima mjere kako bi se što prije razvila u jaku državnu policijsku snagu sposobnu da se, između ostalog, bori protiv organiziranog kriminala i terorizma;

Konstatirajući da je, prema prijelaznim i završnim odredbama ovog Zakona, postupak imenovanja rukovodnog osoblja Agencije, uključujući njenog direktora, zamjenika direktora, pomoćnika direktora za Kriminalističko-istražni odjel i pomoćnika direktora za Odjel za unutrašnju kontrolu, trebalo okončati najkasnije za šest mjeseci od dana stupanja na snagu navedenog Zakona;

Imajući na umu takođe da na osnovu Zakona o Državnoj agenciji za istrage i zaštitu i Zakona o policijskim službenicima Bosne i Hercegovine (“Službeni glasnik Bosne i Hercegovine”, br.

27/04 i 63/04) imenovanje direktora, zamjenika direktora i pomoćnika direktora za Krivično-istražni odjel i pomoćnika direktora za Odjel za unutrašnju kontrolu Agencije vrši Vijeće ministara Bosne i Hercegovine u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine ("Službeni glasnik Bosne i Hercegovine", br. 7/03 i 37/03) (u daljem tekstu: *Zakon o ministarskim imenovanjima*);

Konstatirajući nadalje da se imenovanja izvršena na osnovu *Zakona o ministarskim imenovanjima* rukovode općim načelom selekcije zasnovane na profesionalnim sposobnostima i da je organ zadužen za imenovanje dužan uložiti maksimalne napore kako bi osigurao da u navedenim imenovanjima po pravilu budu zastupljeni narodi i građani Bosne i Hercegovine;

Podsjećajući da, zbog toga što postupak imenovanja navedenog rukovodnog osoblja nije proveden kao što je predviđeno u prijelaznim i završnim odredbama *Zakona o Državnoj agenciji za istrage i zaštitu*, visoki predstavnik je u decembru 2004. godine donio Odluku kojom je izmijenio i dopunio *Zakon o Državnoj agenciji za istrage i zaštitu*, čime je produžen rok za navedena imenovanja za dodatna dva mjeseca ("Službeni glasnik Bosne i Hercegovine", br. 63/04 i 35/05);

Uzimajući u obzir da, do dana danas, Vijeće ministara nije popunilo preostala rukovodna radna mjesta u Agenciji;

Svjesni da je potrebno da se ova radna mjesta popune kako bi se osigurao normalan rad Agencije;

Iz razloga koji su ovdje navedeni visoki predstavnik ovim donosi sljedeću

ODLUKU

o imenovanju pomoćnika direktora za Odjel za unutrašnju

kontrolu Državne agencije za istrage i zaštitu

Član 1.

Ovom odlukom imenuje se g. Mirza Lisinović na mjesto pomoćnika direktora za Odjel za unutrašnju kontrolu Agencije na mandat u trajanju od četiri (4) godine, počevši od 9. septembra 2005. godine.

Član 2.

Tokom perioda navedenog u članu 1. ove odluke, g. Lisinović će vršiti svoje dužnosti i odgovornosti pomoćnika direktora za Odjel za unutrašnju kontrolu Agencije u skladu sa Zakonom o Državnoj agenciji za istrage i zaštitu i ostalim relevantnim zakonima i propisima Bosne i Hercegovine.

Član 3.

Ova odluka stupa na snagu odmah i odmah se objavljuje u "Službenom glasniku Bosne i Hercegovine".

Sarajevo, 9. septembar 2005.

*Paddy Ashdown
Visoki predstavnik*